


MUZUNDI MUPATI A SINGUZU

 Mwabuka kabotu, nyoonse. Nkoonya “Kukkomana kwa Pasika” kuli umwi aumwi wanu! Obu mbumwi bwa mazuba malemu, mu ciibalusyo ca bubuke bwa Mwami wesu. Mbumwi bwa mazuba malemu a makani onse akale mu nyika. Bwalo mbubuke. Elyo tuli kkomene kapati kuba okuno, kuseeni oku, aa buzuba obu bulemu. Elyo kubona kupasuka kwazuba, a malubaluba kabuka kuzwa mu nyika, zintuzyonse zyaambaula Pasika.

Elyo eno atu kotamike mitwe yesu asyoonto buyo.

² Taata Leza, mu Busyu Bwako twa sika. Alimwi tulangila Nduwe ku tupa, kuseeni oku, cilongezo ciniini cambasela kuzwaku Julu, kugumwa kumwi kuniini kwa Pasika mu buntu bwesu; kuteeti, cindi twa nooli ano, inga twaamba, mbuli abo bakazwa ku Emau, “Sena myoyo yesu tii yali kupya mukati kesu, nkaambo ka Busyu Bwakwe?” Nkambo, twa cilomba mu Zina Lyakwe, aku kaambo ka bulemu Bwakwe. Amen.

³ Omuya mu bbuku lyamamanino, chipati ca 28 ica Makanimabotu aa Musalali Matayo, a kampango ka 7, Ndi yanda kubala cibalo, mbuli mbo tunjila mu kuswaangana oku.

Elyo kamuya cakufwambaana, akuyo ambila basikwiiya bakwe kuti wa buka kuzwa ku bafu; alimwi, amubone, ula unka kumbele lyanu ku Galilaya; okuya mu ku mubona: mubone, Nda mwaambila.

⁴ Kwakali kutumwa kunji kupati kwakapegwa ku muntu a bantu ba nyika eyi. Pele taku nabede kutumwa kupati boobo kwakapegwa mbuli kooku kumwi, “Kamuya mukabaambile basikwiiya Bakwe kuti Wa buka kuzwa ku bafu.” Oko nkulaililwa kupati. Elyo nzila ilikke oku mbo kwaakonzya kupegwa, nkaambo kwa keelede kuba kuzunda kupati, lutaanzi.

⁵ Kweelede kuba mwaalumi mu mazuba esu, amu mazuba akainda, amu makani mapati akale aa inyika eyi, mu masena awo akubelekela, mapati aankondo; kwakali bazundi banji bapati, zintu zinji zipati zya kacitilwa mukowa wabantu.

⁶ Kupa mukozyanyo, Ndila yeeya, mbuli Mbwe selemuka kuseeni oku, kusinsimuka cakufuma, nkabela nse jisi ciindi cakubala maningi. Nkaambo, Nse zyi kuti cali cibeela cili, masiku amamanino, nco twalino oba aco sunu, akati ka mweembeli a Ndime, mu miswaangano. Pele nkeselemuka mu lweendo lwangu, Nda citika kuyeeya cintu, kuseeni oku, kuti nikwaba kubotu loko nko Ndi zyi kwaamba ku bantu Bakwe, kutola mulumbe. Nda yeeya ceeci, “Kamuya mukabaambile basikwiiya Bakwe.” Lino, *basikwiiya* Bakwe balo “mbatobezi

bakwe.” Ii *sikwiyya* ngu “umwi uutobela.” Elyo Nda yeeya eci ciyyo, ca, *Muzundi Mupati A Singuzu*.

⁷ Elyo mukuyeeya zya bazundi bapati banji mbo twa kajisi mu inyika eyi, a zintu zipati nzoba kacita kukusumpya a kugwasya nzila ya buntu iya kupona. Ndali kuyeeya zya Napoleon mupati, kaindi mu mazuba akwe, obo mbwa takali nconzyo muna Frenchi, pele wa kajisi cintucimwi mu mizeezo yakwe. Lutaanzi, wa—wa sampaula France, ta kali kwiiyanda. Wa kazwa ku tusuwa. Pele wa kajisi muyeeyo mu maanu akwe, kuti, buzubabumwi wakali kuyooba muzundi. Elyo kaambo nca kajisi eyi mu maanu akwe, wa kacita kuba a cintucimwi cakubelekela wo.

⁸ Ku muntu onse, kotana konzya kucita ncito, weelede kuba a kukanza kumwi, nzila imwi, cintucimwi ncobeleka wo, nkambo ka bukanze bwakubeleka, cintucimwi caku belesya.

⁹ Elyo tonse mbuli mbo tuzyi, ku kubweza makani akale akwa Hitler. . .na, kutali akwa Hitler, pele akwa—akwa Napoleon, kuti wa keenda kwinda ku mweezi, akwinda ku kucinca kwa nyenyeezi. Wa kabeleka nzila eyo, a kulangila; nkaambo kakuti ciindi cimwi wa kacita boobo, nkabela wa kawina luzundo. Elyo wa kaboola mu France, nkabela wa kaba silumamba mupati. Wa kajaya bantu banji, nkaambo kakuti tiiba kazuminana a nguwe. Elyo wa kasalazya cisi cakwe conse, cili conse cakali kumulwana. Wa ka cizimaazya cakumaninina, nkaambo wa keelede kucicita nzila eyo. Ikuti na taka cicita mu nzila eyo, nikwa kaba cintucimwi caku mulwana ciindi coonse, nkabela mabambe akwe mapati ayo nga kajisi mu maanu akwe. Buumi bwakwe nibwa kaba mu ntenda, aboobo wa kayandika kubamba bwami bwakwe bonse cakulondoka mbuli mbwa kali kukonzya kubucita.

¹⁰ Ndi yeeya kuti lino mula nditobela muli ceeci, ca Muzundi mupati oyo Ngwe yeeya. Zintuzyonse mu Bwami Bwakwe zyeedelede kuba Zyakwe. Kwe elede kuba moyo, buntu, a mubili, kuba Zyakwe. Ta kukonzyi kuba cintu ci Mu lwana. Kufumbwa eco cakali ku Mu lwana, Na ka cigusya. We elede kubamba zyonse kuba Zyakwe kumaninina. Elyo cindi . . .

¹¹ Napoleon, wa kabweza zilwanyo, matobolo mapati, intobolo, nsindaile, mapanga. Elyo wa kali kuunka a muyeeyo oyu omwe, kuti wa kali kuyo zunda inyika. Elyo wa kacicita eco mubwini, kali amyaka yakukomena ili makumi otatwe aitatu. Cindi na kali mwaalumi mukubusyi, wa kali sikwiiminina kukasya zimwi. Elyo mpuwo yakwe mpati yaka mubamba kuba sikulibanda; elyo kwa kajata ku kuyeeya kwakwe, kusikila wa kafwa kali amyaka ili makumi otatwe aitatu, sikunywa zikola maningi. Mpuwo yakwe, ta kakonzya kwiima. Elyo Ndi yeeya zya muntu, walo ali eyi, ku kukomena kwa myaka ili makumi otatwe aitatu, wakazunda inyika akufwa kali sikunywa zikola maningi,

nkaambo ka impuwo yakwe, nkabela waka sweekelwa nguonya mulazyo ngwa kali kulwanina. Wa kali i—wa kali musyobo wa bube, na, kutali bube, inga Nda ti, pele wa kali cibelesyo ca dyabulosi. Elyo kasola kulwana kuusya inyika, nkabela wa kakakilwa, kali makumi otatwe aitatu.

¹² Pele, oh, Silumamba oyu, mupati singuzu Ngwe kanana, kali amyaka ili makumi otatwe aitatu yakukomena, wakazunda zintuzyonse zyakali mu nyika a mu—mu gehena. Kali amyaka ili makumi otatwe aitatu yakukomena, Muzundi mupati a singuzu!

¹³ Ndi yeeya nkondo zipati zya kalwanwa mu masena akubelekela. Tu lizi, kumanizya kuli Napoleon, cakuti wa kasika kumagolelo akwe ku Waterloo. Cakali coolwe cangu, kutali kaindi kalamfu kakainda, kuyo bona zikozyanisyo zya kabambwa ku zicaalwa zya nkalaki zyakwe, azya basimbizi azya bantu, obo mbo bakakkala mu masena akulwanina nkondo. Elyo nkalaki zyaka lundana, mavwili akatyoka, moonya akuzwa mu nkwaalale, oko kutondezegwa oku kupati nkobu bambwa.

¹⁴ Elyo ino nkwiindana kuliko: kuziba kuti muntu kali makumi otatwe aitatu, a mause abikkidwe alya mu ciibalusyo ca nkondo yakwe mpati a kuzunda; elyo mpawo kuya ku Jerusalemu, akulanga ku kabanda katakwe cintu, mbuli ciibalusyo ca Muzundi mupati a singuzu.

¹⁵ Kumwi kumbi, kuli cintucimwi mu kuzunda. Ikuti na kuli cintucimwi neo tulwanina, ikuti na kuli bulwazi mu mubili wesu, nkabela tu lwana akati ka lufu a buumi, ino nkuzunda kuli buti cindi twa bubona kabuzundwa. Ikuti na tulwana mucito umwi mupati, na cintucimwi cipati eco citu nyonganya, kumalekelo cindi kuyumba kwa ndembela zipati nkabela twa buzunda; ino nkulimvwa nko kutupa, mukati kesu, nkambo tula konzya mpawo kuba bazundi.

¹⁶ Lino Ndi yeeya zya lumamba lwamamanino, anzila cindi Hitler mbwa katola Warsaw. Eyo bana German bakali kuyeeya kuti oko kwakali kumwi kwa kuzunda kupati loko kwa kakonzya kuba, nkaambo kakuti silutwe wabo mupati, Adolf Hitler, ciindi cimwi wakabbizya zintuzyonse mu Warsaw, kamwaya zizabukilo, nkabela cizabukilo cipati cakawa. I mitende yaka bweza zifwanikiso zipati zya kuwa kwa cizabukilo. I bana German baka macing'a mu kagwagwa, nkabela bakauma ngoma akusiba ludweba, nkabela zyuulu zya ndeke zya kainda muni lyakwe, mbuli mbwa kawina kuzunda kutaanzi kwakwe kupati. Kabamba mbuli Alexander Mupati, na Napoleon, ku kuzunda inyika, pele ino waka golela kuli? Mu mause. Cilimasimpe, Wa kacita.

¹⁷ Nda konzya kuyeeya cindi niba kayaka Burma Pass mpati. Kwa keelede. . . ikuti na baka landuka atala lya mulundu oyu. Basankwa bamwi bali kkede awa kuseeni oku, antela, abo bakalanduka atala a kazila aka kapati. Ino yakali ncito!

Nkunji buti kwa mulimo wini ngo wakatola, a ncito ini njoba kacita! A kuvula kwa mali ngo cakatolela kuyaka Burma Pass, mamilioni aamadola! I basankwa bakasweekelwa maumi abo, mu kucita boobo! Pele kumalekelo, alimwi kwiinde kaindi, cindi maile yamamanino ya nzila niya kamana, alimwi cindi kazila nika kamanizigwa, oko koongolola kwa kuzunda mbo kwa kasumpulwa kuzwa ku bantu! Ba kajisi kazila mpo bakali kukonzya kulanduka malundu, kuyo winina luzundo.

¹⁸ Ndi yeeya kazila kambi, kuti buzuba bumwi caka tolela buumi bwa Mwami wesu uulelekedwe. Tii wakali mugwagwa biyo aa nyika, pele wakali mugwagwamupati uutegeza “mugwagwamupati wa busalali,” oko batasalali nkoba takaindi, pele biyo abo bakasimbwa. Citabiyo abo bali ku lubazu Nkwa bede, baya kwinda mu mugwagwa oyuu.

¹⁹ Inzundo zipati zya kawinwa. Bunji bwesu sunu inga twa yeeya kabotu zya Lumamba Lutaanzi Lwanyika. Ndila yeeya cindi Ne kali buyo musankwa muniini, Nda konzya kumvwa kusibwa kwa ludweba; anobaba balimi, mu muunda, bakaimika mbizi zyabo, aku vukauzya ngowani zyabo. Ba kakwiila. Ba ongolola. Ncinzi caka citika? I lumamba lwakamana. Kuzunda kwa kawinwa. I lubono ndo twakali kulwanina, kumalekelo twa kawina kuzunda.

²⁰ Ndi yeeya olu lumamba lwamamanino ilwa inyika. Nda kali kukkala mutala biyo lya kagwagwa. Elyo cindi ndweba nizya katalika kusibwa, bantu baka zuzila mu mapu; banakazi kabasamide tusila twabo, kaba tusamununa akutu yumba mu luwo. Misyonga yakauluka kwinda mu masamu. Ndweba ziyakasibwa. Myootokala yaka siyana mu tugwagwa. Bantu bakawida ku mazwi abo, akunyamuna maanza abo mujulu. Ba kakwiila. Ba kalila. Nkaambonzi? Nkaambo lumamba lwakamana. Elyo bantu balelekedwe, basankwa bayandwa bakali mutala lya lwizi, kuti cakufwambaana banoenda mu maanzi kusika ku muunzi alubo kuli mbabo. Ino nkuzunda! Ino nciindi, akubotezya ku moyo uli wonse! Ino ni jubbili! Obo busiku, muntu onse wakali mu kusesya oko, inga nokeenda mu restrandu kuyoolya, a kuzwa a kuta cibbadelela, nikwa kaba kabotu. Inga nokabelesya mootokala ya muntu umbi, nikwa kaba kabotu. Inga noka lombi eco ncokali kuyanda, alimwi antela noka cipegwa. Ku kaambo kanzi? I kuzunda kwa kawinwa. I basankwa bakali kusika ku muunzi. Lwa kamana lonse.

²¹ Elyo Nda yeeya, mukwesu wangu, ncibbi loko kuti oko kulimvwa kuli boobo taku konzyi kukkalilila ciindi conse. Pele, ku Munakristo, kuseeni oku, kuzunda kwawinwa. I milangu ya lutangalo ilalila. I lumamba lwamana, akati ka Leza a muntu. I kuzunda kwawinwa.

22 Kakutaninga kuba kuzunda kumwi kujanwa, kweelede kuba myuulo mipati ibbadelwa. Oh, ino myuulo! Alimwi ziindizimwi ili sakene kapati, alimwi icitya mbata zipati, kuzapaula. Pele, kutegwa kujanwe mulundu, twe elede kuba a kkuti. Kakutaninga kuti tube a kumweka kwazuba, twe elede kujana mvula. Katutaninga konzya kuba amumuni, twe elede kuba a busiku. Katutaninga konzya kuba aciluleme, twe elede kuba acilubide, nape nota kaziba acilubide mbo cakabede.

23 Pele kutegwa kuzundwe akuwina nkondo mapati maningi eyo ya kawinwa lyoonse, Umwi wakaseluka kuzwa ku Bulemu, myaka minji yakainda. Elyo Ta kali bwezela Mwini ciwa ca Angelo. Ta kasika kali muntu umwi mulemu. Pele Wa kali kuyo tondezya kuti tii cakatola sindaile a misyonga, a mabbomba aatomiki, ku kuwina lumamba. Wa kalisamika Mwini mu bubombe, mbuli muvwanda mucece, nkabela wakazyalilwa mu cilido. Kwakanyina busena nobuba bwa kuzyalilwa Kwakwe, cindi Na kasika. Ndi yanda kulanga cibelesyo candeene cankondo, eco Nca kaamba.

24 Lino, mukowa wa Adamu onse wakali mu bwaange. Mbaabo mbo bakabede, kabatakwe bulangizi, kabatakwe Leza, kabatakwe coolwe, kabatakwe luse, kabatakwe cili conse cakali kukonzya kuba gwasya. I basinkondo bapati, ba zilao zyaansi zya basweekede, baka jalilwa mu mudima. Kwakanyina nzila ya mapolelo. Kwakanyina wakali kukonzya kugwasya. Taakwe cakali kukonzya kucitwa. Kwakali kuboneka, kusweekelwa, kumaninide do.

25 Pele Sicamba wesu, Oyo wakaseluka kuzwa ku milyango yeebeka yaku Bulemu, kalitola ansi!

26 Nkambo, kwakanyina muntu aansii wakali kukonzya kucita ncito. Boonse bakali, mbuli kwaambaula kwanyika, mu bwaato bomwe. Swebo twakali, toonse, “kazyalwa mu cibi, kabambwa mu milandu, kasika ku inyika kuzo beja.” Elyo taakwe umwi wesu wakali kukonzya kugwasya umwi aumwi. Twa kaimikila katutakwe bugwasye, cakuzundwa, lupyopyongano ku lubazu alumwi, konse kutagola. Tii twaka konzya kubamba milao a mapobwe, mukujana kukompama kwawo a zimwi, tii twaka cikonzya kucicita. Elyo cakalibonya mbuli kuti mukowa wonse wabantu wakabikkwa cabuyo.

27 Elyo mpawo Wa kasika, Wa kaseluka. Nkaambo, “Wa kali kumatalikilo,” Bbaibbele lyakati, “Wa kali Ijwi.” Wa kali Logosi ya kazwa kuli Leza. Alimwi Logosi, ku matalikilo, yakali Ijwi. Elyo Wa kaba Ijwi. Mpawo cindi Na katanta kujulu ku buzuba obo bwabulemu bwa Pasika, Ta kaba biyo Ijwi, pele Wa kaba Mupaizi Mupati wa Ijwi Lyakwe Mwini. Oh, ino ncintu cabulemu, Mukwesu Neville! Ko ciyeeya! Ta kali biyo Ijwi, pele Walo Mupaizi Mupati wa Ijwi Lyakwe Mwini. Mbobuti mbo tukonzya kucizumbauzya? Mbobuti mbo tukonzya kweenda

kuli Nguwe akuta syoma kuti tula tambula nco twa lombela? Nkambo, Walo ndi Ijwi a Sikukombelezeya wa Ijwi! I Logosi yakaba Ijwi, alimwi Ijwi lyakaba mu mubili; alimwi nguonya mubili oyo wakali Ijwi, wakatambulwa mu Bulemu, alimwi eno ngo Mupaizi Mupati ubamba kukombelezeya, Alikke, ku Ijwi Lyakwe.

²⁸ Eco nce citola! Eco nce cintu Mbungano ncoi jisi. Ino ncilwanyo! Kwakanyina cimwi cakali mbuli Ncico. Wa kali Ijwi. Elyo cindi Na kasika, Wa kazyalilwa mu cilido. Wa kasika kubelesya cilwanyo ca l-u-y-a-n-d-i-s-y-o, luyandisyo, kuzunda inyika; kakutakwe misyonga ya mpi, kutali a meshini gani a myootokala yampi. Pele Wa kasika mu ziyanza zyandeene. Wa kanjila mu ciwa ca luyandisyo. Wa kali luyandisyo lwa Leza.

²⁹ Ciindi cimwi, mbuli musankwa muniini, Nda kali kuyeeya kuti Kristo wakali kundiyanda, nkabela Leza wakali kundisula; nkaambo kakuti Kristo wakandi fwida, pele Leza waka jisi cintucimwi caculwana ndime. Pele Nda kaboola kujana kuti Kristo ngo nguwe moyo wa Leza. “Leza mbwaka yandisya inyika, cakuti Wa kapa Mwana Wakwe simuzyalwa alikke, kuti kufumbwa uusyoma Nguwe taka lobi, pele uyooba a Buumi Butamani.”

³⁰ Lino Wa kasika, lutaanzi, kuyo zunda. Elyo cintu eco dyabulosi nca kabikka mu inyika lwakali luzondo. Elyo Wa kasika kuzunda luzondo. Cindi twa wina nkondo zyesu, azimwi zimbi, mu nkondo zya inyika, lyoonse cilazwa, cakuzumanana, luzondo; nkaambo, nkondo zya musyobo oyo nzya sinkondo. Pele Kristo wakasika a luyandisyo, lwa kuzunda luzondo, ku kuyanda abo baka jisi buyande. Wa kasika a cilwanyo candeene. Elyo Wa kalibombya Mwini, “kubambwa muniini asyoonto kwinda Baangelo,” kukupengela kufwa, a kupa mukozanyo. Elyo cindi Na kali ano ansi, Wa keenda akati ka bantu.

³¹ Wa katondezeya zilwanyo Zyakwe zyankondo, cindi Na kaponya baciswa. Cindi Na kabweza mabbisiketi osanwe masyoonto a nswi zyobilo, nkabela wakasanina bantu bali zyuulu zyoanwe, Wa katondezeya kuti Wa kajisi nguzu ku matomiki onse ayo akaliko. Kutali biyo kuti Wa kavuzya nswi, pele Wa kavuzya nswi zijikidwe. Kutali biyo kuti Wa kavuzya whiiti mu mabbisikite ayo, pele Wa kavuzya whiiti wakajikidwe mu mabbisiketi ayo. Ca katondezeya kuti Wa kali oyo Muzundi mupati a singuzu! Kutali biyo kuti Wa kaleka maanzi kuzwa ku mukalo, pele Wa kapanga ayo maanzi, waini, kuzwa ku mukalo. Wa katondezeya kuti Wa kajisi nguzu zya kuzunda. Alimwi Wa kayanda, a cilwanyo Cakwe lwakali luyandisyo. Lino amubone.

³² Mpawo cindi na kacita ceeco, cindi Na kaimikila buzuba bumwi kumbali lya cuumbwe ca Lazaro, elyo mpaawo kwakali muntu, uufwide, a wakazikkidwe mazuba one. Nobaba bakali muni, “Nokuba lino ula nunka.” Mpemo yakwe yaka bobela,

tuuka twa lukanda twa kayavwula kwinda muli nguwe. Elyo Jesu wakaimika alya, mbuli Muzundi singuzu, cindi Na kaambila Marta a Mariya, cindi Na kaimikila alya, “Sa tee Nda mwaambila, ‘Ikuti na inga mwasyoma biyo, inga mwabona bulemu bwa Leza?’” Wa kazwaa kumanizya kwaamba (cindi niba kati, “mukwesu wesu uli fwide,” abumwi bumbi), Wa kati, “Ndime bubuke a Buumi! Oyo uusyoma Ndime, nekubakuti wa kali fwide, uciya kupona. alimwi kufumbwa oyo upona a usyoma muli Ndime, ta kafwi pe. Sena Nse zwaa kumwaambila kuti ezyo Nguzu, zilelekedwe Zitamani zili muli Ndime?” Ta kaamba biyo kaambo, Wa kali kukonzya kucita zintuzyonse Nzya kaamba, nkambo Wa kali Muzundi singuzu.

³³ Kakkala muli Nguwe, kalisisa, kasisidwe a mubili wabuntu, mbuli muntu, pele mukati omuya mwaka kkala kutali umbi cita Leza Singuzuzyonse, Umwi mupati a singuzu. Wa kali kukonzya kulengulula. Wa kali kukonzya kulenga zintu zipya. Wa kali kukonzya kwaambaula, alimwi eco Nca kalomba cakali kunopegwa mu kavwalu ako. Pele, Wa kalibombya Mwini, Wa kali tola ansi. Wa kali kuyanda kupa mukozanyo. Wa kali kuyanda kuba musyobo uli kabotu wa Muzundi, nkabela Mbwa kabede. Lino, Wa katondezya Mwini kuba boobo.

³⁴ Mbuli Mbwe kaamba kanji mu miswaangano yangu, ndiza inga capa bumboni kuseeni oku, mu nkamu eyi ya bantu, aa kuseeni oku kwa Pasika mubotu. Ii mulindu, uzulilwa ku mbungano imwi eyo iitasyomi mu kuzumina Bulowa bwa Mwami Jesu. “Kakutakwe kutilwa kwa Bulowa, takukwe kujatilwa kwa cibi.” Waa kandaambila kuti oyu Muntu wakali musinsimi buyo, Muntu mubotu, nkabela Nda ka Mu bamba kuba Sibuleza. Nda kati, “Wa kali Sibuleza. Wa kali Leza.”

Waa kati, “Yebo usola ku Mu bamba kuba mupati maningi.”

³⁵ Nda kati, “Taakwe majwi akonzya kupandulula bupati Bwakwe!” Mulaka wabuntu tauna jana bwaambe!

³⁶ Nkekanana a muntu buzuba bumwi, mwiiminizi wacisi uuzwa ku Washington, DC, elyo wa kati, ku bumboni buniini ku ii—ii kalimbabula oko nkotwa kasweengene antomwe, wa kati, “Mukwesu Branham, Nda kali muna Lutherani buumi bwangu boonse. Pele,” wa kati, “buzuba bumwi kuciindi caku janika ku lubukulusyo lwaciyanza cakaindi,” kati, “Nda kafugama ku cipaililo, alimwi kali kuyanda kujana luzibo a Leza.” Wa kati, “Elyo kuciindi ni Nda kali okuya nkefugeme ku mazwi angu . . .” Lino oyu mwiiminizi wacisi waku Washington akwalo wakabeleka kungsi lya Muleli Cooledge. Elyo cindi na, “kalungumana,” wa kati, “Nda kabona cilengaano ca Jesu.” Wa kati, “Ndila konzya kukanana zisyobo zyandeene zili fuka, kabotu loko.” Wa kati, “Pele Nse kakonzya kujana bbala lyomwe lya kwaamba, kwa zisyobo ezi zyonse zili fuka.” Wa kati, “Aboobo Nda katambika buyo janza lyangu, nkabela Wa

kandipa cimwi cipya, ca kubelesya kwaambaula.” Wa kati, “Nda kazwaa kubona Bulemu bwa busyu Bwakwe.”

³⁷ Oyu mulindu wati kuli ndime, waa kati, “Mukwesu Branham, Jesu takali cintu cita muntu, musinsimi buyo.”

Nda kati, “Wa kali Leza, omucizi wangu.”

³⁸ Waa kati, “Yebo Umu bamba kuba Sibuleza, pele Tali boobo.” Aboobo waa kati, “Kaselemuka mu lweendo kuya ku cuumbwe ca Lazaro, Bbaibbele lyakati, ‘Wa kalila.’”

³⁹ Masimpe, Wa kali nguonya moyo wa Leza. Wa kapenga mbuli mbo tupenga. Wa kali mu mubili mbuli mbo tuli bamubili. Wa kayumuna, mu mubili Wakwe, kuyandisya nkoonya a zintu nzo tucita. Nekubaboobo, kuba Cituuzyo cilondokede, Wa kayandika kucita ceeco. Wa kacita. Pele Nda kati . . .

Waa kati, “Wa kalila, kaselemukila ku cuumbwe ca Lazaro.”

⁴⁰ Nda kati, “Pele, oh, omulindu, mbo mbubo. Wa kali Muntu, cindi Na kali kulila. Pele cindi Na kaimikila alya, ku lubazu lwa cuumbwe eco, oko kulala bafu zii; oko mibili ibolede nkoi bikkwa, kaivumbidwe a zilembo; cindi Na kati, ‘Amu gusyebwe.’ Wa kakwela antomwe bupange Bwakwe buniini, a kuti, ‘Lazaro, ko buka!’ Elyo muntu waka fwide, kwa mazuba one, wakaimikila ku matende akwe.”

⁴¹ Ino cakali cinzi? Kubola kwa kaziba Mulengi wako. I buntu bwakaziba Mulengi wabo. Elyo oyo Muzundi mupati a singuzu wakatondezya awo kuti Wa kajisi Nguzu zya lufu, a ku gehena, a cuumbwe.

⁴² Masimpe, cibotelezya moyo wesu! Wa ambaula kujatikizya kulizya mpani, akulizya milangu? I inyika yeelede kuba mu jubbili kuseeni oku, mbuli kutana bede, kukwiila a koongolola kwa bantu Bakwe, nkaambo obu mbuzuba bwa ciibalusyo cindi Na kazunda sinkondo wamamanino, nkabela twa angununa baange.

⁴³ Iiyi, Wa kali Muntu. Mbo mbubo. Wa katondezya kuti wakali Muntu, alimwi Wa katondezya kuba Leza.

⁴⁴ Busiku bumwi, cindi lwizi, lukali kapati, oyo wakaita zyuulu zya maumi . . . Ndiza nobamwi bamatumbu awa, kuseeni oku, bana banu basankwa bakafwa mu lwizi lukali kulaale, ndiza baka bbila kungsi lya mayuwe mu inyika eyi ya masena mapati aa nkondo. Bamwi bayandwa banu balilede kumasena okuya, ndiza kungsi lya lwizi.

⁴⁵ Pele busiku bumwi cindi Na kalede mu bwaato buniini, nkabela mayuwe kapilauka konse mu lwizi, mbuli kasinsyo ka bbodela. Wa kabuka, a kubika cituta Cakwe aa moombe wa bwaato. Wa kalanga kutozya ku Julu, kati, “Luumuno.” Elyo ku mayuwe, Wa kati, “Kamu tontola!” Elyo olo lwizi

Iwanguzi lwakaumuna kusikila tii lwaka jisi kaimba ali ndulo. Ncamasimpe, Wa kali obo!

46 Nkwa kasimpe kuti Wa kafwa nzala mbuli Muntu. Cindi Na kaseluka kuzwa ku mulundu nkabela Wa kafwa nzala, kalanga ku musamu kuti ajane cintucimwi cakulya, Wa kali Muntu. Pele cindi Na kabweza ayo mabbisiketi osanwe a nswi zisyoonto, akusanina bali zyuulu, Wa kali kwindilila ku Muntu.

47 Cindi Na kafwa myaka yakainda ili cuulu amyaanda ili fuka, buzuba bwa zoon, kalengelela aa ciingano, kakwiilila luse, “Leza Wangu, Leza Wangu, nkaambonzi Wa Ndi siya?” Wa kafwa mbuli Muntu. Pele myaka ili cuulu amyaanda ili fuka aimwi yakainda, kuseeni oku, Wa katondezya obo Mbwa kabede! Wa kapa caando camamanino ca bumesiya Bwakwe cindi Na kazapaula zyaanzyo zya lufu a gehena, a kubuka kuzwa ku cuumbwe, cakuzunda, “Ndila pona lyoonse! Alimwi, nkaambo Ndila pona, mula pona anywebo!”

48 Ngooyo Muzundi! Mwaambaula kunyukaanya kasila a kukayumba? Bantu baamba kuti tuli nyongene nkaambo tula ongolola alimwi tula zuzaana, alimwi tula kwiila alimwi tula ompolola. Ta bana kumvwa kunzwiima kwa kuzunda kwaku Julu, kuteeti, “I nkondo yamana!” Muzundi wesu, mupati singuzi wakawina nkondo yonse! Uli imvwi alikke, kuseeni oku, katagumwi!

49 Cindi Na kasika ku nyika, baka Mu pa zina lyaansi maningi ndyoba kakonzya ku Mu pa, mbuli “sikwiindilizya.” Ba ka Mwi ita kuti *Beezebule*, “sibwami wa madaimona.” Mbo mbubo. Wa kaunka ku munzi waansi maningi uliko mu nyika, Jeriko, a muntu muniini maningi mu munzi waka cita ku Mu langila ansi. Pele cindi Leza, myaka yakainda ili cuulu amyaanda ili fuka, waka Mu busya! Eco muntu ncaka Mu citila. Pele, a cilwanyo ca luyandisyo, Wa kazunda madaimona onse.

50 Elyo Leza waka Mu sumpula atala maningi, aku Mu pa Zina lilaatala lya zina lyonse liliko lyuuzikidwe ku Majulu a nyika. Lyonse zina ku Julu lila kotama ku Zina lya “Jesu”! Onse Angelo, onse mwami ulela cisi, zintuzyonse zila kotama ku Zina lya “Jesu”! Onse mulaka uyo Mwa amba, mazwi onse ayo Mu kotamina. Elyo Ula tanta atala maningi eni, mane awalo We elede kulangila ansi ku kubona Majulu. Oyo Muzundi singuzi! Ngo Nguwe waka cicita! Cindi Na kasiya nyika, kumane, busiku bwainda twa kali jisi, Wa kajisi makki aku lufu aku gehena kalengelela ku lubazu Lwakwe, ameni, “Muta yoowi, Ndime Oyo wakafwide, alimwi ndapona alubo lyoonse. Alimwi” (*alimwi* nkuswaanganya) “Ndi jisi makki aku lufu aku gehena, kaalengelela mpoonya *awa*.” Mwaambaule kujatikizya Muzundi! “Alimwi, nkaambo Nda kazunda, Nda kabamba biyo mugwagwamupati wanu wa kweendela.”

⁵¹ Muntu waakakwa kuzwa ku Julu, migwagwamipati waka jalwa. Kwakanyina migwagwamipati. Pele, awo kwakanyina migwagwamipati, Wa kasika kubamba omwe. Oh, ma! I muncali mutaanzi wakali wa madaimona akuzumbauzya, utobela wakali wakucimwa kutali kabotu, utobela wakali wa kuliyanda; eyi inyika yaka vumbidwe aa mincali ya nguzu zya madaimona; mpawo kuciswa, malwazi. Pele cindi Na katalika kutanta kuya ku Julu! Busiku bwainda twa kali Mu jisi kazwa mu gehena, kajisi makki aku lufu aku gehena ku lubazu Lwakwe. Kuseeni oku tu Mu tola aatala. Aleluya! Cindi Na kabuka, Wa kajisi. . . Wa kali sikuzwidilila. Elyo, Mbwa katantila kujulu, Wa kamwaya zyonse nguzu zya madaimona ezyo zidyaminina muntu. Wa katanta Kujulu, akupa zipego ku bantu, zipego zya Muuya Uusalala. I Muzundi singuzu! Uli imvwi alikke, kuseeni oku! Elyo, akati ka Nguwe a musyomi onse, kuli mugwagwa ulelekedwe wakaindi wa busalali oyo balulami ngo baya kweendela wo. Takukwe nzila ya kuyokoka. Kuli muncali omwe biyo wakadelulwa ansi kuzwa ku Bulemu. Wa kasiya Mano ajisi Malowa manji mbuli Mbwa keenda mu tukondo twa inguzu zya madaimona, aku tubambila mugwagwamupati, lweendo loonse. Uli kkede Atala, kuseeni oku, mbuli Muzundi singuzu!

⁵² Bantu Bakwe bajisi jubbili. Makumi azyuulu zya mbabo, konse ku inyika, aongolola kuzunda.

⁵³ Nda kalangilila oku kusangana kwakaindi kutontola kwatulengwa. Nda konzya kuyeeyela umwi kati. . . Ndila mutondezya kuzwa kwa ncico.

⁵⁴ Awa, mbo lwa kamaninina buyo Lumamba Lutaanzi, mulumbe wakali kuseluka ku mugwagwa okuno, kuboola mu bbasi lyaku Greyhound. Ba kati, “Ino coongo conse ncanzi? Ino ncanzi conse?”

⁵⁵ Elyo umwi wabo wakati, “Langisya awa, ndeeli pepa. I lumamba lwakazwaa ku mana.” Elyo muntu onse kalila a koongolola.

⁵⁶ Pele umwi mwanakazi wakati, “Oh, ma, nkaambonzi caka kagola boobo?” Kati, “Ikuti ni cakakonzya buyo kumana kwa mazuba masyoonto ambi,” kati, “John a Ndime nakali kkede mu kagwagwa kakulikwaya.” Kati, “Ni twa kali kkede alya.”

⁵⁷ Kwakali muntu wakaimvwi kusule lya bbiilu lya bbasi; kajana mwanakazi oyo, alimwi kutandila ku muwaala kwinda ku mulyango. Elyo cindi polisi niyaka jata mwaalumi, wa kati, “I kaambo Nce cicitila,” wa kati, “oyo mwanakazi taka jisi umwi okuya ngwa kali kubikkila maanu. Pele Ndi jisi basankwa bobile okuya.” Wa kati, “Nse konzya kujata kulimvwa kwangu.”

⁵⁸ Oh, mukwesu! Ndi jisi taata okuya kutala. Ndi jisi bayandwa okuya kutala. Ncintucimwi kuli ndime, cindi Jesu nakazunda. Ndili jisi mukaintu. Ndili jisi muvwanda. Ndili jisi

bayandwa. Oyo Muzundi, mupati singuzu! Inga mwandiita kuti ndili “mubumbulusi uusalala” na “sikwiindilizya mukombi,” kufumbwa mbo muyanda. Pele, cindi Nda yeeya zya lumamba olo lupati lwaka bambwa, muulo wakabadelwa, kuzunda kwa kawinwa. Jesu wakabuka kuzwa ku bafu, caando camalekelo ca bumesiya Bwakwe, kuti koonse kwamana. Walo muumi, kuseeni oku, kajisi makki aku lufu a gehena. Ndili jisi bayandwa kutala lya munyinja kulaale. Ndili mu mugwagwamupati wakaindi mubotu, kweenda atala kuyo babona. Muta yeeyi kuti Ndili sondokede. Oh, pele Ndili kkomene kapati kuti lwaka bambwa lonse! Walo mulimo wakamanizigwa.

Mukupona, Wa kandi yanda; mukufwa, Wa kandi futula;
Mukuzikkwa, Wa katola zibi zyangu kulaale;
Mukubuka, Wa kalulamika cabuyo kwalyonse:
Buzubabumwi Uyo boola—oh, buzuba bwabulemu!

⁵⁹ Olu lubbizyo lulelekedwe lwakaindi ilwa Muuya Uusalala, ku tweenzya kutanta oyu mugwagwamupati wakaindi mubotu, oh, obo mbo Luli lwabulemu! Mbobuti Mbwe konzya kusola kufwabweeme kuli Ndulo? Nda imikila a Musalali Paulo, kuseeni oku, kwaamba ceci, “Nse fwibweeme ku Makanimabotu aa Jesu Kristo, nkambo Ni Nguzu zya Leza ku lufutuko.” Ni Nguzu ku malwazi. Ni Nguzu ku lufu. Ni Nguzu ku cuumbwe.

⁶⁰ Cindi oyo muapostolo sikusinizya, wakaindi nakasika ku magolelo a lweendo lwakwe, nkabela bakasya cuumbwe cakwe kubusena obuya, nkabela lufu lwakali kuboola kumeso akwe, wa kaseka nkoonya kumweso a ndulo. Wa kati, “Olufu, luli kuli lumoola lwako? Ocuumbwe kulaali kuzunda kwako?” Mpawo wa kongolola kulumbaizya kwa Leza, “Pele alumbwe Leza Oyo uutupa kuzunda kwinda mu Mwami wesu Jesu Kristo!”

⁶¹ I Muzundi singuzu loko wakasola kukkala, Muzundi wanguzu loko wakasola kufwa, nkambo Wa kali Oyo luzutu wakali kukonzya kuzunda; kufwa, akuzunda lufu kulugama, akubuka alubo mu kuzwidilila! Wa katondezya obo Mbwa kabede. Ca kali caando camamanino ca bumesiya Bwakwe.

⁶² Elyo ino, mu coolwe, ikuti na kwaba umwi mu buyake obu kuseeni oku, uli ngu simbungano ukasaala buyo, nkabela tazyi lutangalo lwa nkondo kuti yamana. Bantu balaongolola, bantu balasekelela, bantu balaomoka! Nywebo mwati, “Ino ndipenzi nzi kuli mbabo?” Ba lizi kuti ncintu cimanide. Conse cakamana! Masimpe! Tuli [Mukwesu Branham wakamba maanza akwe—Mul.] mukucitya nkamu zyabaimbi. Tu citya myeembo koongolola, a Makanimabotu kaunka ku masena. I bulemu a Nguzu zya Leza zyazibwa. Elyo mulimo wamanizigwa,

cipangano casainwa; bulemu kuli Leza, Kristo wakacisaina mu Bulowa Bakwe Mwini! I nkondo yamana. I kuzunda kwawinwa. Nse kakuwina; Wa kakuwina! Ndili kkomene ncobeni kujatikizya ndulo. Ma!

⁶³ Cindi bamwi basankwa abo bajokela kuzwa ku masi alandukwa lwizi, ba kandaambila, cindi bwaato nibwa kadunuka mu New York, mbo bwaka sikila buyo ku ccito, ba kalanga okuya akubona Cibumbwa ca Bulubusi. Ncintu citaanzi nco bona, kacyuna. Ba kabuka, bamwi basiluzibo bakaindi kabasunkuta kabali aa desiki lya bwaato, kutegwa kaba cibona. Elyo cindi niba katalika kubona eco Cibumbwa ca Bulubusi, baka talika koomoka. Ba kalila. Tiiba kakonzya kucicinca. Muntu mupati ncobeni kaimvwi alya, muntu wa maanza mapati agalankene, kaabimba a kuzungaana. Tiiba kakonzya kujata kulimvwa kwako. Nkaambonzi? Ca kali cizibyo ca lwaanguluko. Kunze buyo lya ceeco Cibumbwa ca Bulubusi, kakkede... kwakali bataata, baama, bayandwa, muyandwa, mukaintu, muvwanda, boonse a nyika eyi njo bakali kuyandisya, kakkala buyo kunze lyayo. Elyo kabatana kweenda buyo kunjila, ba kaziba, cakali cilao ca kwaanguluka a muunzi wa basicamba. Masimpe, inga cazungaanya kulimvwa kwako, eyo ndembela yakaindi kaipepela. Amu ciyeeye, siluzibo wakaindi kajisi mbata zya munkondo kaboola ku ccito! Nincobeni, cakali cindi cibotelezya.

⁶⁴ Pele, oh, mukwesu, bumwi bwa cifumo, cindi Bwaato bwakaindi bwaku Zaoni bwaakulila, elyo Nda bona eco cizibyo kaciimvwi alya, Ciingano cakaindi cigalankene! Kuciindi myuuwo kayuuma zilembo zyakuzibya zyayo zyakaindi zisiyasiya, mbuli mbo yeenda kwiinda muli sikunku wa lufu. Ino nduzundo mbo lubede! Baa, ta cigambyi tatu konzyi kuumuzya kulimvwa kwesu! Cintucimwi caka citika; twa kaba basicisi nyina. I cintu camanizigwa.

⁶⁵ Cindi niba kandandamika cizabukilo cipati akati ka Northi a—a—a Southi Australia, kuzwa ku Sidney, kuya ku Southi Sidney. Obo muntu onse mbwa kabweza... Baa, ba kaunka konse ku cisi, kusola kujana muntu wa kucicita. Eyo yakali ncito mapati loko, nkaambo bakati kwakanyina wakali kukonzya kwiicita. Kumalekelo, muntu uuzwa ku England wakati, “Njo icita ncito.” Elyo cindi na kaselemukila okuya kuyo cita ncito, wa kasoleka mabbautu onse akanjila mu cizabukilo. Mpuwo yakwe yakali mu ntenda. Wa kasoleka ntimba yonse a zintuzyonse zya kaunka ansi. Wa kazunguluka, a cibotu maningi nca kakonzya kujana; wa kajana bamakkanika bakubwene loko, mbabonya basilwiiyo lwa kketri, nzyoonya zintuzyonse zibotu loko nzya kakonzya kujana, konse kuli nguwe. Elyo, kumalekelo, cindi cizabukilo nicaka manizigwa, nkabela buzuba bwakasika awo mpo cakeelede kusunkwa.

66 Basikujana butongo bakaimikila kumbali lya lubazu lomwe, a kwaamba, “Ta cika jatilili. Ciyo zungaanina kuwa ansi. Oyo musenga munji loko ansi awo.”

67 Pele wa kasya kuya, kuya, kuya ansi loko. Wa kajisi kaanzambwene. Wa kalizi kuti zintuzyonse zya kasunkwa. Elyo wa kati, “Ndila bamba musinzo mutaanzi kuzabuka, lwangu.” Elyo mbuli Mbwa keenda kuzabuka cizabukilo, kumeso aa meya, kusule mbuli obo; a citima cipati, cakali kutandila cisambomwe mu bwamba, kasika kuzabuka, kuzunganya eco cizabukilo. I muntu mupati oyo waka cikonzya, wakeenda kumeso a maccililanwa aya, mbuli boobu, “Ikuti na ciwe, Ndi nooli ancico.” Pele wa kajisi kaanzambwene.

68 Eyo nje nzila Mwami wesu ulelekedwe mbwa kacita cindi Na kapanga Mbungano Yakwe! Wa kasunka mabbauto onse, zintuzyonse ziya muli Njiyo, nkambo Ye elede kusanzigwa kubelesya Bulowa! Elyo umwi wa basikujana butongo wakaliimvwi ku lubazu, kati, “Eco cikama ca babumbulusi basalala, taba kocikonzya.” Pele bumwi bwa mazuba aya abulemu! Oyu Muzundi, mupati singuzu uleenda kumbele lyesu sunu, kazwidilila! Amwi leke inzwiime, kucita kufumbwa ncoi ciyanda, Uya... Takukabi kudyobokela komwe ali ncoi, ali onse, nkambo Wa kabamba nzila, a kwiimanizya. Masimpe!

69 Tula yeeya sunu aa zipangano zya bantu, kubikka mizeezo yesu azintu zya inyika. Pele andi kwaambile cintucimwi, mukwesu, utandi lekeli kufwabweeme ku Makanimabotu! Oh, mukwesu, Ndili siciyanda cakaindi, wakazyalululwa, wakazyalwa ku Muuya Uusalala, wa Muuya wa Leza. Nda kazyalwa boobo, nkukonse Mbwe bede, a konse Nkwe yanda kuba lyonse.

70 Ciindi cimwi, calino lino, kwakali musimbi wa kainka ku kkolegi. Elyo waa kali musimbi, muniini mubotu. Elyo cindi na kabweeda ku muunzi, waa kaletelezya mizeezo yakwe yaku kkolegi.

71 Elyo ndiza, kuseeni oku, nobamwi mwa jisi mizeezo yaanze antomwe andinywe. Ndiza mwakabweza, ku mbungano, mizeezo yanu minji. Ee, amwi gusyey, nce cintu cibotu kwinda Nce zyi kucita.

72 Mpawo oyu musimbi, cindi citima nicaka imikila kunembo, waa kaletelezya musimbi muniini, umwi wabaabo ba musyobo muniini wa batolo basikulya misaalo, nywebo mulizi, mbuli bube bwa Elvis Presley. Elyo cindi na kaimvwi alya, nywebo mulizi, ku citima, banyina bakali, aanze, mucembele kaimvwi alya, kajisi mbata konse, kumeso akwe; makuko, maniini adiimene; kasamide dresi liniini lya kkaliko, a shawelo atala lya makuko akwe. Elyo oyu mutolo sikulya misaalo muniini wakali anguwe, oyu musimbi umbi, wakalanga ansi, a kuti, “Ee, nguni oyo uboneka kusampuka, wakaindi ugalankene amupenzi?”

⁷³ Ee, nywebo mulizi, caka ubausya musimbi kapati, waa kati, “Ta ndizi,” nkaambo waa kali kupakamana kukulilemeke kabotu loko akulebwa kuli bumwi, alimwi waka jisi mizeezo minji yanyika mu mutwe wakwe. Elyo bakali banyina beni.

⁷⁴ Cindi na kaseluka mu citima, mucembele muniini wakazuzila okuya, wa kamugwambatila amaboko akwe. Waa kati, “Oh, oyandwa, Leza alongezye moyo wako muniini.” Elyo waa kafutata akutalika kuzwa, mbuli kuti taka bazyi. Waa kaubausigwa, nkaambo banyina bakali galankene maningi.

⁷⁵ Elyo cakacitika kuba, kkondakita wa citika eco, wakali kazi kaano. Wa kazungulukila okuya, akubikka maanza akwe a ciwezo ca musimbi oyo, kamunyonena kulanga bbunga elyo, wakati, “Mause kuli nduwe! Mause kuli nduwe!” Wakati, “Nda kacibona ciindi banyoko nibakali ziindi zili kkumi kubota kwinda mbuli mbobede.” Wakati, “Waa kali...Nda kakala mu busena bweengelede.” Elyo wakati, “Wa kali muvwanda muniini, alimwi wakali acibuye caatala mu kalo kako kaniini. Elyo banyoka bakali kwaanzika zisani kusule lya lubuwa.” Elyo wakati, “Mpoonya buyo, ceengelo caka jata mulilo, nkabela ng’anda yonse yakali kuyaka mulilo. Elyo cindi banyoko baniini niba kazuzwa ambele, akuziba kuti wakali mu cibuye caatala, atala alya.” Wakati, “Ba kakwiila, akusola ku bakwempa. Pele waa katapula kubelesya nco ka jisi, kuzwa, akuzuzwa kwinda mu kuyaka oko kwakali mulilo, kuya acibuye caatala; a kukwela zisani zyabo kuzwa ku mubili wabo, akuvungaila nduwe muli nzyizyo. Elyo mpaawa waa kasika, kujoka kwinda mu kuyaka kwamulilo, kaba kubwezede. Elyo ba kawizuka, mu lubuwa, kaba kujisi mu maboko abo.” Elyo wakati, “Ba kabweza eco cakalino bakwabilila, akukwabilila nduwe.” Elyo wakati, “I kaambo ncoli mubotu sunu, ako nkekaambo ncoba bagalankene. Elyo, sa ukanza kundaambila kuti, weelede kufwabweeme ku mbata ezyo zili ali banyoko?”

Nda yeeya sunu:

Ikuti na Jesu uyumuna ciingano alikke,
Elyo inyika yoonse kayeenda cakwaanguluka?
Kuli ciingano ca bantu boonse,
Elyo kuli ciingano cangu.

⁷⁶ Ikuti na Jesu wa kalanganisigwa kuba “Bezebule,” ku inyika eyi, Wa kasekwa a kusabulwa, a kulengelela aa ciingano, waka sampaulwa nkambo ka ndime, Ndili kkomene cakwindilila kuyumuna sampu lya busalali Bakwe. Iiyi, munene. Koita, “Mubumbulusi uusalala!” kufumbwa mboyanda kwiita, kufumbwa kwaamba nkoyanda kucita. Eco ta cicileysi nokuceya. Ndi kkomene biyo, kuseeni oku, kuti, mu moyo wangu, Kristo wakabuka ulapona a kulela. Ndili umwi wa balelwa Bakwe. Ndi syoma kuti uli boobo, ayebo.

⁷⁷ Ciindi cesu camana eno. Ngu seveni okuloko ini, cindi ni twaamba kuti tula mwaika. Miswaangano iiciza iyo talika kutandila maora obilo, eno, aa naini theeti.

Atu kotamike mitwe yesu, asyoonto buyo, mu mupailo.

⁷⁸ Taata Wakujulu Ulelekedwe, maminiti ali makumi one ainda, Ijwi lya unka. Myoyo yesu ili kkomene. I jubbili ili mukucitika; kutali buyo jubbili ya buzuba bomwe, pele jubbili ya Butamani! Mu Bulemu, Baangelo bala imba. O Leza, Mbungano, yakazwidilila, ila imba. I milangu ya lutangalo ila lila. Bantu bakapedwe milandu limwi ya lufu, a kufwa akuya ku cuumbwe ca dyabulosi, dyabulosi waka zundwa! Lufu lwaka zundwa. I cuumbwe caka zundwa. Kuciswa kwaka zundwa. Malweza aka zundwa. Minyono yaka zundwa. Nsulaiko yaka zundwa. Kancimwa kaka zundwa. Kusiya kwaka zundwa. Kulibanda kwaka zundwa. Zintuzyonse zyaka zundwa. Kristo Muzundi mupati!

Amulange! Amubone Muzundi singuzu,
(wakaamba sikuyabila)
Amulange! Amu Mu bone mukubonekela
kwaantagalala,
Nkambo Walo Muzundi singuzu,
Mbokunga Wa zapula cisitilizyo mu bubili.

⁷⁹ Wa kakwapula eco cisitilizyo caka sinkila bantu kuli Leza, elyo eno Leza ukkala akati ka bantu. Wa kazapula eco cisitilizyo caka sinkila kuponya kwa Leza. Wa kazapula eco cisitilizyo caka sinkila cilongezyo ca Leza. Wa kazapula eco cisitilizyo caka sinkila lutangalo lwa Leza. Wa kazapula eco cisitilizyo caka sinkila luumuno lwa Leza. Lino cisitilizyo cizapwidwe mu bubili. A Bulowa Bwakwe Mwini, Wa keenda kali Muzundi! I nkondo yakamana, Wa kakutondezya kuli ndiswe mu bubuke Bwakwe. Elyo eno Muuya Uusalala ngu kamboni, wakatuminwa ku tusololela.

⁸⁰ O Leza Uutamani, ikuti na kwaba umwi kuseeni oku, oyo uwayawaya, kanjikanji, kuzwa ku mugwagwamupati, kawida ku mbali lya nzila, tana konzya kweenda kabotu akati, antomwe a basicamba balemu, basicamba balemu abo bakalyata akati ka mugwagwamupati, twa komba, kuseeni oku, kuti bayoopa maumi abo onse kuli Nduwe, a kuyutuka a kubotelwa olu luzundo lupati lwa kawinwa a Mwami wesu wakabuka. Ko cipa, Taata, nkambo twa cilomba mu Zina lya Kristo.

⁸¹ Elyo kuciindi notu kotamikide mitwe yesu. Ndali buzya, mu mwaakwe oyu wa ciindi, kuteeti walombwa utambike maanza ako kuli Kristo, a kuti, “Kristo, Nda lumba, Nse kabi abweeme kuli Nduwe alubo. Nda kali kuliseda buyo aniini.” Leza aku longezye, omulindu. Leza a kulongezye, munene. Leza a kulongezye, yebo. Oh, ma, maanza kainka koonse! “Nda kali kulisenda aniini. Nda kali kubaanga nkufwabweeme. Elyo

Nda bubona nconzyo busena bwangu eno. Nse keelede kucita ceeco. Nde elede kwiima cakuyutuka, kupa bumboni bwangu! Nde elede kucita ceeco mbubonya. Nde elede kwaambila bonse kuti, 'Nda kazyalululawa.' Nde elede kwaambila bonse kuti, 'Nda katambula Muuya Uusalala.' Nse fwibweeme bwa Makanimabotu, nkambo Alo ni Nguzu zya Leza ku lufutuko. Ndi yanda kuba Munakristo ncobeni uya busumpuka. Nse na bede. Pele, ku lugwasyo lwa Leza, kuzwida ku Pasika eyi cifumo, Njo oba. Ndiya kuba." Umwi umbi atambike maanza akwe eno, katutana kupaila? Leza aku longezye, yebo, yebo, yebo.

⁸² Ma, amulange kusala! Nobaceya bali makumi obile abosanwe na makumi otatwe, kabakkede akati ka nkamu eyi niini ya bantu kuseeni oku, babamba kulisalila. Kuzwa ku kuzwidilila oku kuseeni kupati, baya buya, ku luzyalo lwa Leza, akwimikila cantangalala akuta fwabweeme bwa Makanimabotu, nkambo Ni Nguzu zya Leza ku lufutuko.

⁸³ O Leza, mbuli aya maanza mbwa nyamunwa, a ciimbo kacilila kujokoloka cabubotu kunselelo lya mugwagwa, mbuli mbo twa kazwa ku lufu kuya ku Buumi, nkambo Wa kaamba kuti, "Oyo uumvwa Majwi Aangu, akusyoma Oyo waka Ndi tuma, ujisi Buumi buteeli." Ba kazwa ku lufu kuya ku Buumi, nkaambo Wa kaba lufu kutegwa babe Buumi, kwinda mu bubuke Bwako. Wa kabambwa kuceya loko kwinda Baangelo, kaseluka ansi kuzooba muntu, wakazwa muli eyo Theofani mpati kuzwa oko Kulaale, wakaba mu mubili wabuntu alimwi waka jisi Bulowa, akutila obo Bulowa, kuteeti Wa kobamba nzila yaku yokokela kwesu toonse. Mpawo kutali biyo kucicita, (twa kacibala mu Bbaibbele), pele Wa kacitondezya, cakutakakilwa, kwinda kukubuka kuzwa ku bafu, a kubuka kuzwa ku bafu cindi Nokali waano aa nyika; kutali obo luzutu, pele Wa kapa, Wa kacibamba kuba cizibyo cabubili, mbuli Mbo kacitila Abrahamu; eno, kunze lya boobo, Wa katuma Muuya Uusalala kujoka mbuli kamboni. Elyo tu jisi Busyu Bwakwe bulelekedwe antomwe andiswe, a muli ndiswe, ku tweenzya, ku tusololela mu Bwini a Mumuni onse.

⁸⁴ Twa Ku lumba nkambo ka maanza aya anyamunwa, kuseeni oku, kwaamba kuti, "Nda bweza Kristo lino mbuli wangu." O Leza, ikuti na tabana bbizigwa mu maanzi, ku kwiiminina lufu akuzikkwa, kupati, a bubuke bwa Mwami wabo ulelekedwe, akube kuti bapiluke ku kuswaangana kuseeni oku, baletezye zisani zyabo, akuli bambila kuselemukila mu ciziba eci cijisi caanda. Ko cipa, Taata.

⁸⁵ Kotu longezya. Tujatile zibi zyesu. Tuyo Kupa kulumbaizya, monse mu makkalo aciza. Cindi nkondo ya kumaninina, cindi busi bwa kumaninina konse, a lutangalo lwaku manizigwa lonse, bwa milomo ya nyika eyi, oko nko tulumbaizya Nduwe azintuzyonse nzotu jisi, tuya kuyandika kuba a majwi mapya,

bulenge bupya, bwaku belesya kulumbaizya Nduwe. Akube kuti tu njile mpawo a lutangalo. Nkambo twa cilomba mu Zina Iya Kristo. Amen!

⁸⁶ Atwi imikele ku matende esu eno...?...Muta lubi miswaangano, naini theeti. Kamuya ku miinzi, mukalye tulimbabala twanu. Mupiluke, tu langila kuba andinywe eno. Elyo mpawo sunumasiku, amuyeeye. Nde elede kutantamuka masika aya, kukubala a kukomba.

⁸⁷ Nkambo Nda mwaambila, kuti, Kristo ulapona, Ta fwide pe. Elyo Ndila syoma, a moyo wangu onse, Uya kuba moonya mu buyake obu sunumasiku, ku kutondezya kuti Ula pona, ku kucita zintu nzyoonya Nzya kacita kuli elyo Pasika taanzi cifumo a kwinda mu lweendo lwa buumi Bwakwe. Ikuti na eco tacili boobo, nkokuti Nda kali musinsimi mubeji. Ndili kkomene kapati kuziba kuti mu oora eli pati lisiya ndyo tuponenamo, cindi bulangizi boonse, nobuboneka, kumana; Kristo, Mwaala muyumu mpo tukonzya kwiimina, masena amwi onse miseenga iibbila. Yaa.

⁸⁸ Lwiimbo lwesu, luniini lwaku mwaikila, lwakuti *Ko Tolelela Zina Iya Jesu*. Nyoonse, antoomwe lino.

Ko tolelela Zina Iya Jesu,
Mwana wa buusu a mapenzi;
Liyo pa lutangalo a . . .

⁸⁹ Kovuuluka nconzyo, akusukana maanza, a kwaamba, “Alumbwe Mwami,” ku muntuumwi munsu lyako. (Ee, alelekwe Mwami . . . ? . . .)

Bulangizi bwa nyika a lutangalo lwaku Julu;
Zina liyandisi, O mbolili bbotu!
Bulangizi bwa nyika a lutangalo lwaku Julu.

⁹⁰ Lino nyoonse mwalanga ku nzila eyi ini na? Atu Mu lumbaizye buyo. Atu tambike maanza esu, akwaamba, “Ndaku Lumba, Mwami, ku kufutula buntu bwangu.” Ncibotu, nyoonse!

Ndaku Lumba, Mwami, ku kufutula buntu
bwangu,
Ndaku Lumba, Mwami, ku kundiponya.
Ndaku Lumba, Mwami, ku kupa kuli ndime,
Lufutuko Lwako lupati luzwide loko
alutaulwi.

⁹¹ Ino ncintu cilelekedwe! Sena mula Mu yanda? Amwaambe, “Ameni.” Oh, i . . . Zintuzyonse zyamanizigwa lino, nobana. Zintuzyonse zyamana, ta kucikwe nkondo, ta kucikwe zyalumamba, taakwe ncoelede kucita; caka citwa kale. Tu sekelela buyo! Oh, ma! Tuli maninide, muli Nguwe!

. . .kuyaama,
Kabotu akukwabililwa kuzwa ku kulibilika
konse;

Kuyaama, kuyaama,
Kuyaama ku maboko aateeli.

Oh, obo cabobotu mbo tweenda mu nzila eyi ya
bamuzwamasi,

Kuyaama ku maboko aateeli;
Oh, obo kazila mbo kamweka kuyabuya kuzwa
ku buzuba akuyaku buzuba,
Kuyaama ku maboko aateeli.

Kuyaama, kuyaama,
Kabotu a kukwabililwa kuzwa ku kulibilika
konse;

Kuyaama, kuyaama,
Kuyaama ku maboko aateeli.

Yebo nokonzya, ano jisi katambala, ka gwisye.

. . .oh, kuyaama,
Kabotu a kukwabililwa kuzwa ku kulibilika
konse;

Kuyaama, kuyaama,
Kuyaama ku maboko aateeli.

Lino Bbaibbele lyako!

Kuyaama, kuyaama,
Kabotu a kukwabililwa kuzwa ku kulibilika
konse;

Kuyaama, kuyaama,
Kuyaama ku maboko aateeli.

⁹² Ino ncinzi? Kabotu a kukwabililwa, koonse kwamana,
koonse kwamanizigwa, nkondo yamana, caando camamanino
cana matulwa, Wa katanta kujulu. Aleluya!

Kuyaama, kuyaama,
Kabotu a kukwabililwa kuzwa ku kulibilika
konse;

Kuyaama, kuyaama,
Kuyaama ku maboko aateeli.

⁹³ Atu kotamike mitwe yesu kutozya ku bulongo oko Leza
nkwa katugwisya, oko buzubabumwi tuya kutanta kuzwa ku
bulongo bwa nyika. Nkambo, Mwami wesu, wakagusya kuzwa
ku bulongo, kainka mu bulongo, ku kutupa Muuya Wakwe
uutafwi, Wa katanta kuzwa ku bulongo, alimwi bonse abo bali
muli Nguwe, baya kutanta a Nguwe buzubabumwi, kuya ku
zyooko zya balelekedwe.

⁹⁴ Mbuli mbo tukotamikide mitwe yesu, Nda mubona Mukwesu
Smith kuti uli akati kesu, kuseeni oku, mweembeli wa
Mbungano ya Leza; waka nditumina masiku ainda. Mukwesu

Smith, walombwa useluke buyo. Nda libuzya eno, na Mukwesu Smith inga watu mwaisya mu jwi lya mupailo. Mbuli mbo mubindila ku maanda anu, akuyo lya tulimbabula twanu. Mupilukile kuswaangana kwa kwiiya Munsondo, a mulimo wa lubbizyo, mpoonya buyo kutalikila aa naini theeti. Twa lombwa tukotamike mitwe yesu, kuciindi Mukwesu Smith namwaisya mu mupailo.



MUZUNDI MUPATI A SINGUZU TNG57-0421s
(The Great And Mighty Conqueror)

MATOBELANWA AALUBUKULUSYO LWA PASIKA

Oyu Mulumbe aa Mukwesu William Marrion Branham, wakakambaukwa lutaanzi mu Chikuwa aa Pasika Munsondo kuseeni ku kupasuka kwazuba, Mukubwekaangala 21, 1957, ku Branham Tabernacle mu Jeffersonville, Indiana, U.S.A., wa kagu sigwa kuzwa ku rekordi yamagnetiki teepeu a kulembwa cakutagwisyacintu mu Chikuwa. Obo busanduluzi bwamu Chitonga bwa kalembwa a kumwaisigwa aa Voice Of God Recordings.

CHITONGA

©2021 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Kuzibya Kwa Nguzu Zyakkopi

Nguzu zyoonse zilitaminidwe. Eli bbuku inga lyalembwa ku purinta yaku ng'anda ku kubelesya kwamuntu na kuvozegwa, kakutakwe kubbadelesya, mbuli cibelesyo ca kumwaisya Makani mabotu aa Jesu Kristo. Eli bbuku talikonzyi kusambalwa, kulembululwa muciiimo cipati, kubikwa aa webbusaiti, kuyobolwa mu ciyanza cakujokolosya, kusandululwa mu misyobo iimbi, na kubelesegeka kulomba lugwasyo lwa mali kakutakwe kuzumizigwa kulembedwe kwabumboni aa Voice Of God Recordings®.

Ku makani aamba na cakubelesya cimbi ciliko, walombwa kukwaba ku:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org